


题取经诗

晋宋齐梁唐代间 高僧求法离长安
去人成百归无十 后者安知前者难
路远碧天惟冷结 沙河遮日力疲殫
后贤如未谙斯旨 往往将经容易看

——唐·义净三藏法师





香 贊

炉香乍爇 法界蒙熏 诸佛海会悉
遥闻 随处结祥云 诚意方殷 诸佛现
全身

觉林菩萨偈

华严第四会，夜摩天宫，无量菩萨
来集，说偈赞佛。尔时觉林菩萨，承佛
威力，遍观十方，而说颂言，

譬如工画师，分布诸彩色，
虚妄取异相，大种无差别。
大种中无色，色中无大种，
亦不离大种，而有色可得。
心中无彩画，彩画中心，
然不离于心，有彩画可得。
彼心恒不住，无量难思议，
示现一切色，各各不相知。
譬如工画师，不能知自心，
而由心故画，诸法性如是。



心如工画师，能画诸世间，
五蕴悉从生，无法而不造。
如心佛亦尔，如佛众生然，
应知佛与心，体性皆无尽。
若人知心行，普造诸世间，
是人则见佛，了佛真实性。
心不住于身，身亦不住心，
而能作佛事，自在未曾有。
若人欲了知，三世一切佛，
应观法界性，一切唯心造。

（昔人有云，一偈之功，能破地狱，何况此全一章偈耶。愿思此言，勉共传诵。）

赞

稽首本然净心地，
南方世界涌香云，
宝雨宝云无数种，
天人问佛是何因，
三世如来同赞叹，
我今宿植善因缘，
无尽佛藏大慈尊。
香雨花云及花雨。
为祥为瑞遍庄严。
佛言地藏菩萨至。
十方菩萨共归依。
称扬地藏真功德。



慈因积善，誓救众生。
手中金锡，振开地狱之门。
掌上明珠，光摄大千世界。
智慧音里，吉祥云中，
为阎浮提苦众生，
作大证明功德主。
大悲大愿，大圣大慈，
本尊地藏菩萨摩訶萨。

南无大愿地藏王菩萨（三称）



南无本师释迦牟尼佛（三称）

开经偈

无上甚深微妙法
百千万劫难遭遇
我今见闻得受持
愿解如来真实义



地藏菩薩本願經卷上

唐于闐國三藏沙門實叉難陀譯

忉利天宮神通品第一

如是我聞。一時佛在忉利天，為母說法。爾時十方無量世界，不可說不可說一切諸佛，及大菩薩摩訶薩，皆來集會。讚嘆釋迦牟尼佛，能于五濁惡世，現不可思議大智慧神通之力，調伏剛強眾生，知苦樂法。各遣侍者，問訊世尊。是時如來含笑，放百千萬億大光明云，所謂大圓滿光明云，大慈悲光明云，大智慧光明云，大般若光明云，大三昧光明云，大吉祥光明云，大福德光

明云，大功德光明云，大归依光明云，大赞叹光明云。放如是等不可说光明云已，又出种种微妙之音，所谓檀波罗蜜音，尸波罗蜜音，羸提波罗蜜音，毗离耶波罗蜜音，禅波罗蜜音，般若波罗蜜音，慈悲音，喜舍音，解脱音，无漏音，智慧音，大智慧音，师子^[1]吼音，大师子吼音，云雷音，大云雷音。出如是等不可说不可说音已，娑婆世界，及他方国土，有无量亿天龙鬼神，亦集到忉利天宫，所谓四天王天，忉利天，须焰摩天，兜率陀天，化乐天，他化自在天，梵众天，梵辅天，大梵天，少光天，无量光天，光音天，少净天，无量净天，遍净天，福生天，福爱天，广果

[1] 师子：同“狮子”。

天，无想天，无烦天，无热天，善见天，善现天，色究竟天，摩醯首罗天，乃至非想非非想处天，一切天众，龙众，鬼神等众，悉来集会。复有他方国土，及娑婆世界，海神，江神，河神，树神，山神，地神，川泽神，苗稼神，昼神，夜神，空神，天神，饮食神，草木神，如是等神，皆来集会。复有他方国土，及娑婆世界，诸大鬼王，所谓恶目鬼王，啖血鬼王，啖精气鬼王，啖胎卵鬼王，行病鬼王，摄毒鬼王，慈心鬼王，福利鬼王，大爱敬鬼王，如是等鬼王，皆来集会。

尔时释迦牟尼佛，告文殊师利法王子菩萨摩訶萨，汝观是一切诸佛菩萨，及天龙鬼神，此世界，他世界，此

国土，他国土，如是今来集会到忉利天者，汝知数不。文殊师利白佛言，世尊，若以我神力，千劫测度不能得知。佛告文殊师利，吾以佛眼观故，犹不尽数。此皆是地藏菩萨久远劫来，已度，当度，未度，已成就，当成就，未成就。文殊师利白佛言，世尊，我已过去久修善根，证无碍智，闻佛所言，即当信受。小果声闻，天龙八部，及未来世诸众生等，虽闻如来诚实之语，必怀疑惑，设使顶受，未免兴谤。唯愿世尊，广说地藏菩萨摩訶萨，因地作何行，立何愿，而能成就不思议事。佛告文殊师利，譬如三千大千世界所有草木丛林，稻麻竹苇，山石微尘，一物一数，作一

恒河，一恒河沙，一沙之^[2]界，一界之内，一尘一劫，一劫之内，所积尘数，尽充^[3]为劫。地藏菩萨证十地果位已^[4]来，千倍多于上喻，何况地藏菩萨在声闻，辟支佛地。文殊师利，此菩萨威神誓愿，不可思议。若未来世，有善男子善女人，闻是菩萨名字，或赞叹，或瞻礼，或称名，或供养，乃至彩画刻镂塑漆形像，是人当得百返生于三十三天，永不堕恶道。

文殊师利，是地藏菩萨摩訶萨，于过去久远不可说不可说劫前，身为大长

[2] 之：《乾隆藏》《永乐北藏》《中华藏》《大正藏》均作“之”。流通本一作“之”，流通本二作“一”。

[3] 充：《乾隆藏》《永乐北藏》《中华藏》均作“充”。《大正藏》作“克”，应为误刻。流通本一作“充”，流通本二作“充”。

[4] 已：通“以”。《乾隆藏》《永乐北藏》《中华藏》《大正藏》均作“已”。流通本一作“已”，流通本二作“以”。

者子。时世有佛，号曰师子奋迅具足万行如来。时长者子，见佛相好，千福庄严，因问彼佛，作何行愿，而得此相。时师子奋迅具足万行如来告长者子，欲证此身，当须久远度脱一切受苦众生。文殊师利，时长者子因发愿言，我今尽未来际不可计劫，为是罪苦六道众生，广设方便，尽令解脱，而我自身方成佛道。以是于彼佛前立斯大愿，于今百千万亿那由他不可说劫，尚为菩萨。

又于过去不可思议阿僧祇劫，时世有佛，号曰觉华定自在王如来，彼佛寿命四百千万亿阿僧祇劫。像法之中，有一婆罗门女，宿福深厚，众所钦敬，行住坐卧，诸天卫护。其母信邪，常

轻三宝。是时圣女广说^[5]方便，劝诱其母，令生正见。而此女母，未全生信，不久命终，魂神堕在无间地狱。时婆罗门女，知母在世不信因果，计当随业，必生恶趣。遂卖家宅，广求香华，及诸供具，于先佛塔寺，大兴供养。见觉华定自在王如来，其形像在一寺中，塑画威容，端严毕备。时婆罗门女，瞻礼尊容，倍生敬仰。私自念言，佛名大觉，具一切智，若在世时，我母死后，傖^[6]来问佛，必知处所。时婆罗门女，垂泣良久，瞻恋如来。忽闻空中声曰，泣者圣女，勿至悲哀，我今示汝母之去

[5] 说：《乾隆藏》《永乐北藏》《中华藏》《大正藏》均作“说”。流通本一作“说”，流通本二作“设”。

[6] 傖：连词。倘若，假使，又写作“倘”。《乾隆藏》《永乐北藏》《中华藏》《大正藏》均作“傖”。流通本一作“倘”，流通本二作“傖”。

处。婆罗门女合掌向空，而白空曰，是何神德，宽我忧虑。我自失母已^[7]来，昼夜忆恋，无处可问，知母生界。时空中有声，再报女曰，我是汝所瞻礼者，过去觉华定自在王如来。见汝忆母，倍于常情众生之分，故来告示。婆罗门女闻此声已，举身自扑，支^[8]节皆损，左右扶侍^[9]，良久方苏，而白空曰，愿佛慈愍，速说我母生界，我今身心将死不久。时觉华定自在王如来，告圣女曰，汝供养毕，但早返舍，端坐思惟吾之名号，即当知母所生去处。时婆罗门女，

[7] 已：通“以”。《乾隆藏》《永乐北藏》《中华藏》《大正藏》均作“已”。流通本一作“以”，流通本二作“以”。

[8] 支：肢，四肢，后作“肢”。《乾隆藏》《永乐北藏》《中华藏》《大正藏》均作“支”。流通本一作“肢”，流通本二作“肢”。

[9] 侍：《乾隆藏》《永乐北藏》《中华藏》《大正藏》均作“侍”。流通本一作“侍”，流通本二作“持”。

寻礼佛已，即归其舍。以忆母故，端坐念觉华定自在王如来，经一日一夜，忽见自身到一海边，其水涌沸，多诸恶兽，尽复铁身，飞走海上，东西驰逐。见诸男子女人，百千万数，出没海中，被诸恶兽争取食啖。又见夜叉，其形各异，或多手多眼，多足多头，口牙外出，利刃如剑，驱诸罪人，使近恶兽，复自搏攫，头足相就。其形万类，不敢久视。时婆罗门女，以念佛力故，自然无惧。

有一鬼王，名曰无毒，稽首来迎，白圣女曰，善哉，菩萨，何缘来此。时婆罗门女问鬼王曰，此是何处。无毒答曰，此是大铁围山西面第一重海。圣女问曰，我闻铁围之内，地狱在中，是事

实不。无毒答曰，实有地狱。圣女问曰，我今云何得到狱所。无毒答曰，若非威神，即须业力，非此二事，终不能到。圣女又问，此水何缘，而乃涌沸，多诸罪人，及以恶兽。无毒答曰，此是阎浮提造恶众生新死之者，经四十九日后，无人继嗣，为作功德，救拔苦难，生时无善因，当据本业所感地狱，自然先渡此海。海东十万由旬，又有一海，其苦倍此。彼海之东，又有一海，其苦复倍。三业恶因之所招感，共号业海，其处是也。

圣女又问鬼王无毒曰，地狱何在。无毒答曰，三海之内，是大地狱，其数百千，各各差别。所谓大者，具有十八。次有五百，苦毒无量。次有



千百，亦无量苦。圣女又问大鬼王曰，我母死来未久，不知魂神当至何趣。鬼王问圣女曰，菩萨之母，在生习何行业。圣女答曰，我母邪见，讥毁三宝。设或暂信，旋又不敬。死虽日浅，未知生处。无毒问曰，菩萨之母，姓氏何等。圣女答曰，我父我母，俱婆罗门种，父号尸罗善现，母号悦帝利。无毒合掌启菩萨曰，愿圣者却返本处，无至忧忆悲恋。悦帝利罪女，生天以来，经今三日。云承孝顺之子，为母设供修福，布施觉华定自在王如来塔寺。非唯菩萨之母得脱地狱，应是无间罪人，此日悉得受乐，俱同生讫。鬼王言毕，合掌而退。

婆罗门女寻如梦归，悟此事已，便

于觉华定自在王如来塔像之前，立弘誓愿，愿我尽未来劫，应有罪苦众生，广设方便，使令解脱。佛告文殊师利，时鬼王无毒者，当今财首菩萨是。婆罗门女者，即地藏菩萨是。

分身集会品第二

尔时百千万亿不可思，不可议，不可量，不可说无量阿僧祇世界，所有地狱处，分身地藏菩萨，俱来集在忉利天宫。以如来神力故，各以方面，与诸得解脱从业道出者，亦各有千万亿那由他数，共持香华，来供养佛。彼诸同来等辈，皆因地藏菩萨教化，永不退转于阿耨多罗三藐三菩提。是诸众等，久远劫来，流浪生死，六道受苦，暂无休息。

以地藏菩萨广大慈悲，深誓愿故，各获果证。既至忉利，心怀踊跃，瞻仰如来，目^[10]不暂舍。

尔时世尊舒金色臂，摩百千万亿不可思，不可议，不可量，不可说无量阿僧祇世界，诸分身地藏菩萨摩诃萨顶，而作是言，吾于五浊恶世，教化如是刚强众生，令心调伏，舍邪归正。十有一二，尚恶习在。吾亦分身千百亿，广设方便。或有利根，闻即信受。或有善果，勤^[11]劝成就。或有暗钝，久化方归。或有业重，不生敬仰。如是等辈众生，各各差别，分身度脱。或现男子

[10] 目：《乾隆藏》《中华藏》《大正藏》均作“目”。《永乐北藏》作“日”，应为误刻。流通本一作“目”，流通本二作“目”。

[11] 勤：《乾隆藏》《中华藏》《大正藏》均作“勤”，《永乐北藏》作“劝”，应为误刻。流通本一作“勤”，流通本二作“勤”。

身，或现女人身，或现天龙身，或现神鬼身，或现山林川原，河池泉井，利及于人，悉皆度脱。或现天帝身，或现梵王身，或现转轮王身，或现居士身，或现国王身，或现宰辅身，或现官属身，或现比丘，比丘尼，优婆塞，优婆夷身，乃至声闻，罗汉，辟支佛，菩萨等身，而以化度，非但佛身独现其前。汝观吾累劫勤苦，度脱如是等难化刚强罪苦众生。其有未调伏者，随业报应，若堕恶趣，受大苦时，汝当忆念吾在忉利天宫殷勤付嘱，令娑婆世界至弥勒出世已^[12]来众生，悉使解脱，永离诸苦，遇佛授记。

[12] 已：通“以”。《乾隆藏》《永乐北藏》《中华藏》《大正藏》均作“已”。流通本一作“以”，流通本二作“已”。



尔时诸世界分身地藏菩萨，共复一形，涕泪哀恋，白其佛言，我从久远劫来，蒙佛接引，使获不可思议神力，具大智慧。我所分身，遍满百千万亿恒河沙世界，每一世界化百千万亿身，每一身度百千万亿人，令归敬三宝，永离生死，至涅槃乐。但于佛法中所为善事，一毛一涸，一沙一尘，或毫发许，我渐度脱，使获大利。唯愿世尊，不以后世恶业众生为虑。如是三白佛言，唯愿世尊，不以后世恶业众生为虑。尔时佛赞地藏菩萨言，善哉善哉，吾助汝喜。汝能成就久远劫来发弘誓愿，广度将毕，即证菩提。

观众生业缘品第三

尔时佛母摩耶夫人，恭敬合掌，问地藏菩萨言，圣者，阎浮众生，造业差别，所受报应，其事云何。地藏答言，千万世界，乃及国土，或有地狱，或无地狱，或有女人，或无女人，或有佛法，或无佛法，乃至声闻，辟支佛，亦复如是，非但地狱罪报一等。摩耶夫人重白菩萨，且愿闻于阎浮罪报所感恶趣。地藏答言，圣母，唯愿听受，我粗说之。佛母白言，愿圣者说。

尔时地藏菩萨白圣母言，南阎浮提罪报名号如是。若有众生，不孝父母，或至杀害，当堕无间地狱，千万亿劫，求出无期。若有众生，出佛身血，毁谤

三宝，不敬尊经，亦当堕于无间地狱，千万亿劫，求出无期。若有众生，侵损常住，点^[13]污僧尼，或伽蓝内，恣行淫欲，或杀或害，如是等辈，当堕无间地狱，千万亿劫，求出无期。若有众生，伪作沙门，心非沙门，破用常住，欺诳白衣，违背戒律，种种造恶，如是等辈，当堕无间地狱，千万亿劫，求出无期。若有众生，偷窃常住财物，谷米，饮食，衣服，乃至一物不与取者，当堕无间地狱，千万亿劫，求出无期。地藏白言，圣母，若有众生作如是罪，当堕五无间地狱，求暂停苦，一念不得。

摩耶夫人重白地藏菩萨言，云何

[13] 点：玷污。《乾隆藏》《永乐北藏》《中华藏》《大正藏》均作“点”。流通本一作“玷”，流通本二作“玷”。

名为无间地狱。地藏白言，圣母，诸有地狱，在大铁围山之内。其大地狱有一十八所。次有五百，名号各别。次有千百，名字亦别。无间狱者，其狱城周匝八万余里，其城纯铁，高一万里，城上火聚，少有空缺。其狱城中，诸狱相连，名号各别。独有一狱，名曰无间。其狱周匝万八千里，狱墙高一千里，悉是铁为^[14]。上火彻下，下火彻上。铁蛇铁狗，吐火驰逐，狱墙之上，东西而走。狱中有床，遍满万里。一人受罪，自见其身，遍卧满床。千万人受罪，亦各自见身满床上。众业所感，获报如是。又诸罪人，备受众苦。千百夜叉及

[14] 为：《乾隆藏》《永乐北藏》《中华藏》《大正藏》均作“为”。流通本一作“围”，流通本二作“为”。

以恶鬼，口牙如剑，眼如电光，手复铜爪，拖拽罪人。复有夜叉，执大铁戟，中罪人身，或中口鼻，或中腹背，抛空翻接，或置床上。复有铁鹰，啖罪人目。复有铁蛇，缴罪人颈。百肢节内，悉下长钉，拔舌耕犁，抽肠铍^[15]斩，洋^[16]铜灌口，热铁缠身。万死千生，业感如是。动经亿劫，求出无期。此界坏时，寄生他界。他界次坏，转寄他方。他方坏时，展^[17]转相寄。此界成后，还复而来。无间罪报，其事如是。

又五事业感，故称无间。何等为

[15] 铍：《乾隆藏》《永乐北藏》《中华藏》《大正藏》均作“剉”。流通本一作“剉”，流通本二作“剉”。“剉”字是“铍”的异体字。

[16] 洋：同“烺”，熔化，融化。《乾隆藏》《永乐北藏》《中华藏》《大正藏》均作“洋”。流通本一作“烺”，流通本二作“烺”。

[17] 展：经过多种途径，非直接地。《乾隆藏》《永乐北藏》《中华藏》《大正藏》均作“展”。流通本一作“辗”，流通本二作“辗”。

五。一者，日夜受罪，以至劫数，无时间绝，故称无间。二者，一人亦满，多人亦满，故称无间。三者，罪器叉棒，鹰蛇狼犬，碓磨锯凿，铍^[18]斫镬汤，铁网铁绳，铁驴铁马，生革络首，热铁浇身，饥吞铁丸，渴饮铁汁，从年竟劫，数那由他，苦楚相连，更无间断，故称无间。四者，不问男子女人，羌胡夷狄，老幼贵贱，或龙或神，或天或鬼，罪行业感，悉同受之，故称无间。五者，若堕此狱，从初入时，至百千劫，一日一夜，万死万生，求一念间暂住不得，除非业尽，方得受生，以此连绵，故称无间。地藏菩萨白圣母言，无间地

[18] 铍：《乾隆藏》《永乐北藏》《中华藏》《大正藏》均作“剉”。流通本一作“剉”，流通本二作“剉”。“剉”字是“铍”的异体字。

狱，粗说如是。若广说地狱罪器等名，及诸苦事，一劫之中，求^[19]说不尽。摩耶夫人闻已，愁忧合掌，顶^[20]礼而退。

阎浮众生业感品第四

尔时地藏菩萨摩诃萨白佛言，世尊，我承佛如来威神力故，遍百千万亿世界，分是身形，救拔一切业报众生。若非如来大慈力故，即不能作如是变化。我今又蒙佛付嘱，至阿逸多成佛已^[21]来，六道众生，遣令度脱。唯然，世尊，愿不有虑。尔时佛告地藏菩萨，

[19] 求：《乾隆藏》作“永”，应为误刻。《永乐北藏》《中华藏》《大正藏》均作“求”。流通本一作“求”，流通本二作“求”。

[20] 顶：《乾隆藏》作“项”，应为误刻。《永乐北藏》《中华藏》《大正藏》均作“顶”。流通本一作“顶”，流通本二作“顶”。

[21] 已：通“以”。《乾隆藏》《永乐北藏》《中华藏》《大正藏》均作“已”。流通本一作“已”，流通本二作“已”。

一切众生未解脱者，性识无定，恶习结业，善习结果，为善为恶，逐境而生。轮转五道，暂无休息，动经尘劫，迷惑障难。如鱼游网，将是长流，脱入暂出，又复遭网。以是等辈，吾当忧念。汝既毕是往愿，累劫重誓，广度罪辈，吾复何虑。说是语时，会中有一菩萨摩訶萨，名定自在王，白佛言，世尊，地藏菩萨累劫已^[22]来，各发何愿，今蒙世尊殷勤赞叹。唯愿世尊，略而说之。

尔时世尊，告定自在王菩萨，谛听，谛听，善思念之，吾当为汝分别解说。乃往过去无量阿僧祇那由他不可说劫，尔时有佛，号一切智成就如来，应

[22] 已：通“以”。《乾隆藏》《永乐北藏》《中华藏》《大正藏》均作“已”。流通本一作“以”，流通本二作“以”。



供，正遍知，明行足，善逝，世間解，
無上士，調御丈夫，天人師，佛，世
尊，其佛壽命六萬劫。未出家時，為小
國王，與一鄰國王為友，同行十善，饒
益眾生。其鄰國內，所有人民，多造眾
惡。二王議計，廣設方便。一王發願，
早成佛道，當度是輩，令使無余。一王
發願，若不先度罪苦，令是安樂，得至
菩提，我終未願成佛。佛告定自在王菩
薩，一王發願早成佛者，即一切智成就
如來是。一王發願永度罪苦眾生，未願
成佛者，即地藏菩薩是。

復于過去無量阿僧祇劫，有佛出
世，名清淨蓮華目如來，其佛壽命四十
劫。像法之中，有一羅漢，福度眾生，
因次教化，遇一女人，字曰光目，設食

供养。罗汉问之，欲愿何等。光目答言，我以母亡之日，资福救拔，未知我母生处何趣。罗汉愍之，为入定观，见光目女母堕在恶趣，受极大苦。罗汉问光目言，汝母在生作何行业，今在恶趣受极大苦。光目答言，我母所习，唯好食啖鱼鳖之属。所食鱼鳖，多食其子，或炒或煮，恣情食啖，计其命数，千万复倍。尊者慈愍，如何哀救。罗汉愍之，为作方便，劝光目言，汝可志诚念清净莲华目如来，兼塑画形像，存亡获报。光目闻已，即舍所爱，寻画佛像而供养之，复恭敬心，悲泣瞻礼。忽于夜后，梦见佛身，金色晃耀，如须弥山，放大光明，而告光目，汝母不久当生汝家，才觉饥寒，即当言说。其后家内婢



生一子，未滿三日，而乃言說。稽首悲泣，告于光目，生死業緣，果報自受。吾是汝母，久處暗冥。自別汝來，累墮大地獄。蒙汝福力，方得受生。為下賤人，又復短命。壽年十三，更落惡道。汝有何計，令吾脫免。光目聞說，知母無疑。哽咽悲啼而白婢子，既是我母，合知本罪，作何行業，墮于惡道。婢子答言，以杀害毀罵二業受報。若非蒙福，救拔吾難，以是業故，未合解脫。光目問言，地獄罪報，其事云何。婢子答言，罪苦之事，不忍稱說，百千歲中，卒白難竟。光目聞已，啼淚號泣而白空界，愿我之母，永脫地獄，畢十三歲，更無重罪，及歷惡道。十方諸佛慈哀愍我，听我为母所发广大誓愿，若得

我母永离三涂^[23]及斯下贱，乃至女人之身永劫不受者，愿我自今日后，对清净莲华目如来像前，却后百千万亿劫中，应有世界，所有地狱及三恶道诸罪苦众生，誓愿救拔，令离地狱恶趣，畜生，饿鬼等，如是罪报等人，尽成佛竟，我然后方成正觉。发誓愿已，具闻清净莲华目如来而告之曰，光目，汝大慈愍，善能为母发如是大愿。吾观汝母十三岁毕，舍此报已，生为梵志，寿年百岁。过是报后，当生无忧国土，寿命不可计劫。后成佛果，广度人天，数如恒河沙。佛告定自在王，尔时罗汉福度光目者，即无尽意菩萨是。光目母者，即解

[23] 涂：通“途”。《乾隆藏》《永乐北藏》《中华藏》《大正藏》均作繁体“塗”。流通本一作“涂”，流通本二作“途”。



脱菩薩是。光目女者，即地藏菩薩是。过去久远劫中，如是慈愍，发恒河沙愿，广度众生。未来世中，若有男子女人，不行善者，行恶者，乃至不信因果者，邪淫妄语者，两舌恶口者，毁谤大乘者，如是诸业众生，必堕恶趣。若遇善知识，劝令一弹指间归依地藏菩萨，是诸众生，即得解脱三恶道报。若能志心归敬，及瞻礼赞叹，香华衣服，种种珍宝，或复饮食，如是奉事者，未来百千万亿劫中，常在诸天，受胜妙乐。若天福尽，下生人间，犹百千劫，常为帝王，能忆宿命因果本末。定自在王，如是地藏菩萨，有如此不可思议大威神力，广利众生。汝等诸菩萨当记是经，广宣流布。定自在王白佛言，世尊，愿

不有虑。我等千万亿菩萨摩訶萨，必能承佛威神，广演是经，于阎浮提，利益众生。定自在王菩萨白世尊已，合掌恭敬，作礼而退。

尔时四方天王，俱从座起，合掌恭敬，白佛言，世尊，地藏菩萨于久远劫来，发如是大愿，云何至今，犹度未绝，更发广大誓言。唯愿世尊，为我等说。佛告四天王，善哉善哉，吾今为汝，及未来现在天人众等，广利益故，说地藏菩萨于娑婆世界阎浮提内，生死道中，慈哀救拔，度脱一切罪苦众生方便之事。四天王言，唯然，世尊，愿乐欲闻。佛告四天王，地藏菩萨久远劫来，迄至于今，度脱众生，犹未毕愿，慈愍此世罪苦众生，复观未来无量劫

中，因蔓不断，以是之故，又发重愿。如是菩萨于娑婆世界阎浮提中，百千万亿方便，而为教化。四天王，地藏菩萨若遇杀生者，说宿殃短命报。若遇窃盗者，说贫穷苦楚报。若遇邪淫者，说雀鸽鸳鸯报。若遇恶口者，说眷属斗诤报。若遇毁谤者，说无舌疮口报。若遇瞋^[24]恚者，说丑陋癡残报。若遇悭吝者，说所求违愿报。若遇饮食无度者，说饥渴咽病报。若遇畋猎恣情者，说惊狂丧命报。若遇悖逆父母者，说天地灾杀报。若遇烧山林木者，说狂迷取死报。若遇前后父母恶毒者，说返生鞭挞现受报。若遇网捕生雏者，说骨肉分

[24] 瞋：同“嗔”，怒，生气。《乾隆藏》《永乐北藏》《中华藏》《大正藏》均作“瞋”。流通本一作“嗔”，流通本二作“瞋”。

离报。若遇毁谤三宝者，说盲聋喑哑^[25]报。若遇轻法慢教者，说永处恶道报。若遇破用常住者，说亿劫轮回地狱报。若遇污梵诬僧者，说永在畜生报。若遇汤火斩斫伤生者，说轮回递偿报。若遇破戒犯斋者，说禽兽饥饿报。若遇非理毁用者，说所求阙绝报。若遇吾我贡高者，说卑使下贱报。若遇两舌斗乱者，说无舌百舌报。若遇邪见者，说边地受生报。如是等阎浮提众生，身口意业，恶习结果，百千报应，今粗略说。如是等阎浮提众生业感差别，地藏菩萨百千方便而教化之。是诸众生，先受如是等报，后堕地狱，动经劫数，无有出期。

[25] 喑哑：旧作“瘖瘖”。《乾隆藏》《永乐北藏》《中华藏》《大正藏》均作“瘖瘖”。流通本一作“喑哑”，流通本二作“喑瘖”。“瘖”字是“喑”的异体字。



是故汝等，护人护国，无令是诸众业迷惑众生。四天王闻已，涕泪悲叹，合掌而退。

地藏菩薩本願經卷上



贊

如來慈愍 轉大法輪 婆羅門女救
慈親 覺華度迷津 摩耶夫人 請問地
藏因

南無地藏王菩薩摩訶薩（三稱）



地藏菩薩本願經卷中

唐于闐國三藏沙門實叉難陀譯

地獄名號品第五

爾時普賢菩薩摩訶薩白地藏菩薩言，仁者，願為天龍四眾，及未來現在一切眾生，說娑婆世界，及閻浮提罪苦眾生，所受報處地獄名號，及惡報等事，使未來世末法眾生，知是果報。地藏答言，仁者，我今承佛威神，及大士之力，略說地獄名號，及罪報惡報之事。仁者，閻浮提東方有山，號曰鐵圍，其山黑邃，无日月光。有大地獄，號極无间。又有地獄，名大阿鼻。復有地獄，名曰四角。復有

地狱，名曰飞刀。复有地狱，名曰火箭。复有地狱，名曰夹山。复有地狱，名曰通枪。复有地狱，名曰铁车。复有地狱，名曰铁床。复有地狱，名曰铁牛。复有地狱，名曰铁衣。复有地狱，名曰千刃。复有地狱，名曰铁驴。复有地狱，名曰洋^[26]铜。复有地狱，名曰抱柱。复有地狱，名曰流火。复有地狱，名曰耕舌。复有地狱，名曰铍^[27]首。复有地狱，名曰烧脚。复有地狱，名曰啖眼。复有地狱，名曰铁丸。复有地狱，名曰诤论。复有地狱，名曰铁鉢。复有地狱，名曰多瞋^[28]。

[26] 洋：同“烺”，熔化，融化。《乾隆藏》《永乐北藏》《中华藏》《大正藏》均作“洋”。流通本一作“烺”，流通本二作“烺”。

[27] 铍：《乾隆藏》《永乐北藏》《中华藏》《大正藏》均作“剉”。流通本一作“剉”，流通本二作“剉”。“剉”字是“铍”的异体字。

[28] 瞋：同“嗔”，怒，生气。《乾隆藏》《永乐北藏》《中华藏》《大正藏》均作“瞋”。流通本一作“嗔”，流通本二作“瞋”。



地藏白言，仁者，铁围之内，有如是等地狱，其数无限。更有叫唤地狱，拔舌地狱，粪尿地狱，铜锁地狱，火象地狱，火狗地狱，火马地狱，火牛地狱，火山地狱，火石地狱，火床地狱，火梁地狱，火鹰地狱，锯牙地狱，剥皮地狱，饮血地狱，烧手地狱，烧脚地狱，倒刺地狱，火屋地狱，铁屋地狱，火狼地狱。如是等地狱，其中各各复有诸小地狱，或一或二，或三或四，乃至百千，其中名号，各各不同。

地藏菩萨告普贤菩萨言，仁者，此者皆是南阎浮提行恶众生，业感如是。业力甚大，能敌须弥，能深巨海，能障圣道。是故众生莫轻小恶，以为无罪，死后有报，纤毫受之。父

子至亲，岐^[29]路各别，纵然相逢，无肯代受。我今承佛威力，略说地狱罪报之事，唯愿仁者，暂听是言。普贤答言，吾以^[30]久知三恶道报，望仁者说，令后世末法一切恶行众生，闻仁者说，使令归佛。

地藏白言，仁者，地狱罪报，其事如是。或有地狱，取罪人舌，使牛耕之。或有地狱，取罪人心，夜叉食之。或有地狱，镬汤盛沸，煮罪人身。或有地狱，赤烧铜柱，使罪人抱。或有地狱，使诸火烧，趁及罪人。或有地狱，一向寒冰。或有地狱，无限粪尿。或有

[29] 岐：通“歧”，分支，分岔。《乾隆藏》《永乐北藏》《中华藏》《大正藏》均作“歧”。流通本一作“歧”，流通本二作“歧”。

[30] 以：通“已”。《乾隆藏》《永乐北藏》《中华藏》《大正藏》均作“以”。流通本一作“已”，流通本二作“已”。

地狱，纯飞鍱鏃^[31]。或有地狱，多攒火枪。或有地狱，唯撞胸背。或有地狱，但烧手足。或有地狱，盘缴^[32]铁蛇。或有地狱，驱逐铁狗。或有地狱，尽驾铁骡。仁者，如是等报，各各狱中，有百千种业道之器，无非是铜，是铁，是石，是火，此四种物，众业行感。若广说地狱罪报等事，一一狱中，更有百千种苦楚，何况多狱。我今承佛威神及仁者问，略说如是。若广解说，穷劫不尽。

[31] 鍱鏃：《乾隆藏》《永乐北藏》《中华藏》《大正藏》均作“鍱鏃”。流通本一作“鍱鏃”，流通本二作“鍱鏃”。

[32] 缴：《乾隆藏》《永乐北藏》《中华藏》《大正藏》均作“缴”。流通本一作“缴”，流通本二作“绞”。

如来赞叹品第六

尔时世尊举身放大光明，遍照百千万亿恒河沙等诸佛世界，出大音声，普告诸佛世界一切诸菩萨摩诃萨，及天龙鬼神人非人等，听吾今日称扬赞叹地藏菩萨摩诃萨，于十方世界，现大不可思议威神慈悲之力，救护一切罪苦之事。吾灭度后，汝等诸菩萨大士，及天龙鬼神等，广作方便，卫护是经，令一切众生证涅槃乐。

说是语已，会中有一菩萨，名曰普广，合掌恭敬而白佛言，今见世尊赞叹地藏菩萨，有如是不可思议大威神德。唯愿世尊，为未来世末法众生，宣说地藏菩萨利益人天因果等事，使诸天龙八



部，及未來世眾生，頂受佛語。爾時世尊告普廣菩薩及四眾等，諦听，諦听，吾當為汝略說地藏菩薩利益人天福德之事。普廣白言，唯然，世尊，愿乐欲闻。

佛告普廣菩薩，未來世中，若有善男子善女人，闻是地藏菩薩摩訶薩名者，或合掌者，赞叹者，作礼者，恋慕者，是人超越三十劫罪。普廣，若有善男子善女人，或彩画形像，或土石胶漆，金银铜铁，作此菩薩，一瞻一礼者，是人百返生于三十三天，永不堕于恶道。假如天福尽故，下生人间，犹为国王，不失大利。若有女人厌女人身，尽心供养地藏菩薩画像，及土石胶漆铜铁等像，如是日日不退，常以华香饮

食，衣服缯彩^[33]，幢幡钱宝物等供养。是善女人，尽此一报女身，百千万劫，更不生有女人世界，何况复受。除非慈愿力故，要受女身，度脱众生。承斯供养地藏力故，及功德力，百千万劫，不受女身。

复次普广，若有女人，厌是丑陋多疾病者，但于地藏像前，志心瞻礼，食顷之间，是人千万劫中，所受生身，相貌圆满。是丑陋女人，如不厌女身，即百千万亿生中，常为王女，乃及王妃，宰辅大姓，大长者女，端正受生，诸相圆满。由志心故，瞻礼地藏菩萨，获福如是。

[33] 彩：彩色的丝绸。《乾隆藏》《永乐北藏》《中华藏》《大正藏》均作“綵”。流通本一作“彩”，流通本二作“彩”。“綵”是“彩（彩色的丝绸）”的异体字。

复次普广，若有善男子善女人，能对菩萨像前，作诸伎乐，及歌咏赞叹，香华供养，乃至劝于一人多人，如是等辈，现在世中，及未来世，常得百千鬼神，日夜卫护，不令恶事，辄闻其耳，何况亲受诸横。

复次普广，未来世中，若有恶人及恶神恶鬼，见有善男子善女人，归敬供养赞叹瞻礼地藏菩萨形像，或妄生讥毁，谤无功德及利益事，或露齿笑，或背面非，或劝人共非，或一人非，或多人非，乃至一念生讥毁者。如是之人，贤劫千佛灭度，讥毁之报，尚在阿鼻地狱受极重罪。过是劫已，方受^[34]饿鬼。

[34] 方受：《乾隆藏》《中华藏》《大正藏》均作“方受”，《永乐北藏》作“言之”，应为误刻。流通本一作“方受”，流通本二作“方受”。

又经千劫，复受畜生。又经千劫，方得人身。纵受人身，贫穷下贱，诸根不具，多被恶业来结其心，不久^[35]之间，复堕恶道。是故普广，讥毁他人供养，尚获此报，何况别生恶见毁灭。

复次普广，若未来世，有男子女人，久处床枕，求生求死，了不可得。或夜梦恶鬼，乃及家亲，或游险道，或多魇寐，共鬼神游。日月岁深，转复尪瘵，眠中叫苦，惨凄不乐者。此皆是业道论对，未定轻重，或难舍寿，或不得愈。男女俗眼不辨是事。但当对诸佛菩萨像前，高声转读此经一遍。或取病人可爱之物，或衣服宝贝，庄园舍宅，对

[35] 不久：《乾隆藏》《中华藏》《大正藏》均作“不久”，《永乐北藏》作“以入”，应为误刻。流通本一作“不久”，流通本二作“不久”。

病人前，高声唱言，我某甲等，为是病人，对经像前舍诸等物，或供养经像，或造佛菩萨形像，或造塔寺，或然^[36]油灯，或施常住。如是三白病人，遣令闻知。假令诸识分散，至气尽者，乃至一日二日三日四日至七日已^[37]来，但高声白，高声读经，是人命终之后，宿殃重罪，至于五无间罪，永得解脱，所受生处，常知宿命。何况善男子善女人自书此经，或教人书，或自塑画菩萨形像，乃至教人塑画，所受果报，必获大利。是故普广，若见有人读诵是经，乃至一念赞叹是经，或恭敬者，汝须百千方

[36] 然：同“燃”。《乾隆藏》《永乐北藏》《中华藏》《大正藏》均作“然”。流通本一作“燃”，流通本二作“然”。

[37] 已：通“以”。《乾隆藏》《永乐北藏》《中华藏》《大正藏》均作“已”。流通本一作“已”，流通本二作“以”。

便，劝是等人，勤心莫退，能得未来现在千万亿不可思议功德。

复次普广，若未来世诸众生等，或梦或寐，见诸鬼神，乃及诸形，或悲或啼，或愁或叹，或恐或怖。此皆是一生十生百生千生过去父母，男女弟妹，夫妻眷属，在于恶趣，未得出离，无处希望福力救拔，当告宿世骨肉，使作方便，愿离恶道。普广，汝以神力，遣是眷属，令对诸佛菩萨像前，志心自读此经，或请人读，其数三遍或七遍。如是恶道眷属，经声毕是遍数，当得解脱，乃至梦寐之中，永不复见。

复次普广，若未来世，有诸下贱等人，或奴或婢，乃至诸不自由之人，觉知宿业，要忏悔者。志心瞻礼地藏菩

萨形像，乃至一七日中，念菩萨名，可满万遍。如是等人，尽此报后，千万生中，常生尊贵，更不经三恶道苦。

复次普广，若未来世中，阎浮提内，刹利，婆罗门，长者，居士一切人等，及异姓种族，有新产者，或男或女。七日之中，早与读诵此不思议经典，更为念菩萨名，可满万遍。是新生子，或男或女，宿有殃报，便得解脱，安乐易养，寿命增长。若是承福生者，转增安乐，及与寿命。

复次普广，若未来世众生，于月一日，八日，十四日，十五日，十八日，二十三，二十四，二十八，二十九日，乃至三十日，是诸日等，诸罪结集，定其轻重。南阎浮提众生，举止动念，无

不是业，无不是罪，何况恣情杀害，窃盗，邪淫，妄语，百千罪状。能于是十斋日，对佛菩萨诸贤圣像前，读是经一遍，东西南北百由旬内，无诸灾难。当此居家，若长若幼，现在未来，百千岁中，永离恶趣。能于十斋日，每转一遍，现世令此居家，无诸横病，衣食丰溢。是故普广，当知地藏菩萨，有如是等不可说百千万亿大威神力利益之事。阎浮众生，于此大士有大因缘。是诸众生，闻菩萨名，见菩萨像，乃至闻是经三字五字，或一偈一句者，现在殊妙安乐，未来之世，百千万生，常得端正，生尊贵家。

尔时普广菩萨，闻佛如来称扬赞叹地藏菩萨已，胡跪合掌，复白佛言，

世尊，我久知是大士有如此不可思議神力，及大誓願力，為未來眾生遣知利益，故問如來，唯然頂受。世尊，當何名此經，使我云何流布。佛告普廣，此經有三名，一名地藏本願，亦名地藏本行，亦名地藏本誓願經。緣此菩薩久遠劫來發大重願，利益眾生，是故汝等，依願流布。普廣聞已，合掌恭敬，作禮而退。

利益存亡品第七

爾時地藏菩薩摩訶薩白佛言，世尊，我觀是閻浮眾生，舉心动念，无非是罪。脫獲善利，多退初心，若遇惡緣，念念增益。是等輩人，如履泥塗，負于重石，漸困漸重，足步深邃。若得

遇知识，替与减负，或全与负，是知识有大力故，复相扶助，劝令牢脚，若达平地，须省恶路，无再经历。世尊，习恶众生，从纤毫间，便至无量。是诸众生有如此习，临命终时，父母眷属宜为设福，以资前路。或悬幡盖及然^[38]油灯，或转读尊经，或供养佛像及诸圣像，乃至念佛菩萨及辟支佛名字，一名一号，历临终人耳根，或闻在本识。是诸众生所造恶业，计其感果，必堕恶趣，缘是眷属为临终人，修此圣因，如是众罪，悉皆消灭。若能更为身死之后，七七日内，广造众善，能使是诸众生，永离恶趣，得生人天，受胜妙乐，

[38] 然：同“燃”。《乾隆藏》《永乐北藏》《中华藏》《大正藏》均作“然”。流通本一作“燃”，流通本二作“然”。



现在眷属，利益无量。是故我今对佛世尊，及天龙八部，人非人等，劝于阎浮提众生，临终之日，慎勿杀害，及造恶缘，拜祭鬼神，求诸魍魉。何以故。尔所杀害，乃至拜祭，无纤毫之力，利益亡人，但结罪缘，转增深重。假使来世，或现在生，得获圣分，生人天中，缘是临终被诸眷属造是恶因，亦令是命终人，殃累对辩，晚生善处。何况临命终人，在生未曾有少善根，各据本业，自受恶趣，何忍眷属更为增业。譬如有人，从远地来，绝粮三日，所负担物，强过百斤，忽遇邻人，更附少物，以是之故，转复困重。世尊，我观阎浮众生，但能于诸佛教中，乃至善事，一毛一涕，一沙一尘，如是利益，悉皆自得。

说是语时，会中有一长者，名曰大辩，是长者久证无生，化度十方，现长者身，合掌恭敬，问地藏菩萨言，大士，是南阎浮提众生，命终之后，小大眷属，为修功德，乃至设斋，造众善因，是命终人得大利益，及解脱不。地藏答言，长者，我今为未来现在一切众生，承佛威力，略说是事。长者，未来现在诸众生等，临命终日，得闻一佛名，一菩萨名，一辟支佛名，不问有罪无罪，悉得解脱。若有男子女人，在生不修善因，多造众罪。命终之后，眷属小大，为造福利，一切圣事，七分之中而乃获一，六分功德，生者自利。以是之故，未来现在善男女等，闻健自修，

分分全^[39]获。无常大鬼，不期而到，冥冥游神，未知罪福。七七日内，如痴如聋。或在诸司，辩论业果。审定之后，据业受生。未测之间，千万愁苦，何况堕于诸恶趣等。是命终人，未得受生，在七七日内，念念之间，望诸骨肉眷属，与造福力救拔。过是日后，随业受报。若是罪人，动经千百岁中，无解脱日。若是五无间罪，堕大地狱，千劫万劫，永受众苦。

复次长者，如是罪业众生，命终之后，眷属骨肉，为修营斋，资助业道。未斋食竟，及营斋之次，米泔菜叶，不弃于地，乃至诸食未献佛僧，勿得先

[39] 全：《乾隆藏》作“全”，《永乐北藏》《中华藏》《大正藏》均作“己”。流通本一作“己”，流通本二作“己”。

食。如有违食及不精勤，是命终人，了不得力。如精勤护净，奉献佛僧，是命终人，七分获一。是故长者，阎浮众生，若能为其父母，乃至眷属，命终之后，设斋供养，志心勤恳，如是之人，存亡获利。

说是语时，忉利天宫，有千万亿那由他阎浮鬼神，悉发无量菩提之心。大辩长者，作礼而退。

阎罗王众赞叹品第八

尔时铁围山内，有无量鬼王与阎罗天子，俱诣忉利，来到佛所。所谓恶毒鬼王，多恶鬼王，大诤鬼王，白虎鬼王，血虎鬼王，赤虎鬼王，散殃鬼王，飞身鬼王，电光鬼王，狼牙鬼王，千眼

鬼王，啖兽鬼王，负石鬼王，主耗鬼王，主祸鬼王，主食鬼王，主财鬼王，主畜鬼王，主禽鬼王，主兽鬼王，主魅鬼王，主产鬼王，主命鬼王，主疾鬼王，主险鬼王，三目鬼王，四目鬼王，五目鬼王，祁利失王，大祁利失王，祁利叉王，大祁利叉王，阿那吒王，大阿那吒王。如是等大鬼王，各各与百千诸小鬼王，尽居阎浮提，各有所执，各有所主。是诸鬼王与阎罗天子，承佛威神及地藏菩萨摩訶萨力，俱诣忉利，在一面立。

尔时阎罗天子，胡跪合掌白佛言，世尊，我等今者，与诸鬼王，承佛威神及地藏菩萨摩訶萨力，方得诣此忉利大会，亦是我等获善利故。我今有小疑

事，敢问世尊，唯愿世尊，慈悲宣说。佛告阎罗天子，恣汝所问，吾为汝说。是时阎罗天子瞻礼世尊，及回视地藏菩萨，而白佛言，世尊，我观地藏菩萨在六道中，百千方便而度罪苦众生，不辞疲倦。是大菩萨，有如是不可思议神通之事。然诸众生脱获^[40]罪报，未久之间，又堕恶道。世尊，是地藏菩萨，既有如是不可思议神力，云何众生而不依止善道，永取解脱。唯愿世尊，为我解说。

佛告阎罗天子，南阎浮提众生，其性刚强，难调难伏。是大菩萨，于百千劫，头头救拔如是众生，早令解脱。是罪报人乃至堕大恶趣，菩萨以方便力，

[40] 脱获：《乾隆藏》《永乐北藏》《中华藏》《大正藏》均作“脱获”。流通本一作“脱获”，流通本二作“获脱”。

拔出根本业缘，而遣悟宿世之事。自是阎浮众生结恶习重，旋出旋入，劳斯菩萨久经劫数而作度脱。譬如有人迷失本家，误入险道，其险道中，多诸夜叉，及虎狼狮子，虬蛇蝮蝎。如是迷人，在险道中，须臾之间，即遭诸毒。有一知识，多解大术，善禁是毒，乃及夜叉诸恶毒等，忽逢迷人欲进险道，而语之言，咄哉男子，为何事故而入此路，有何异术能制诸毒。是迷路者忽闻是语，方知险道，即便退步，求出此路。是善知识，提携接手，引出险道，免诸恶毒，至于好道，令得安乐。而语之言，咄哉迷人，自今已^[41]后，勿履是道，此路入者，卒难得出，复损性命。是迷

[41] 已：通“以”。《乾隆藏》《永乐北藏》《中华藏》《大正藏》均作“已”。流通本一作“以”，流通本二作“以”。

路人，亦生感重。临别之时，知识又言，若见亲知，及诸路人，若男若女，言于此路，多诸毒恶，丧失性命。无令是众，自取其死。是故地藏菩萨具大慈悲，救拔罪苦众生，生天人^[42]中，令受妙乐。是诸罪众，知业道苦，脱得出离，永不再历。如迷路者，误入险道，遇善知识引接令出，永不复入。逢见他人，复劝莫入，自言因是迷故，得解脱竟，更不复入。若再履践，犹尚迷误，不觉旧曾所落险道，或致失命，如堕恶趣，地藏菩萨方便力故，使令解脱，生人天中。旋又再入，若业结重，永处地狱，无解脱时。

[42] 天人：《乾隆藏》《永乐北藏》《中华藏》《大正藏》均作“天人”。流通本一作“天人”，流通本二作“人天”。

尔时恶毒鬼王合掌恭敬白佛言，世尊，我等诸鬼王，其数无量，在阎浮提，或利益人，或损害人，各各不同。然是业报，使我眷属，游行世界，多恶少善。过人家庭，或城邑聚落，庄园房舍。或有男子女人，修毛发善事，乃至悬一幡一盖，少香少华，供养佛像及菩萨像。或转读尊经，烧香供养一句一偈。我等鬼王敬礼是人，如过去现在未来诸佛。敕诸小鬼，各有大力，及土地分，便令卫护。不令恶事横事，恶病横病，乃至不如意事，近于此舍等处，何况入门。佛赞鬼王，善哉善哉，汝等及与阎罗，能如是拥护善男女等，吾亦告梵王帝释，令卫护汝。

说是语时，会中有一鬼王，名曰

主命，白佛言，世尊，我本业缘，主阎浮人命，生时死时，我皆主之。在我本愿，甚欲利益。自是众生不会我意，致令生死俱不得安。何以故。是阎浮提人初生之时，不问男女，或欲生时，但作善事，增益舍宅，自令土地无量欢喜，拥护子母，得大安乐，利益眷属。或已生下，慎勿杀害，取诸鲜味供给产母，及广聚眷属，饮酒食肉，歌乐弦管，能令子母不得安乐。何以故。是产难时，有无数恶鬼及魍魉精魅，欲食腥血。是我早令舍宅土地灵祇，荷护子母，使令安乐，而得利益。如是之人，见安乐故，便合设福，答诸土地。翻为杀害，集聚^[43]眷属。以是之故，犯殃自

[43] 集聚：《乾隆藏》《永乐北藏》《中华藏》《大正藏》均作“集聚”。流通本一作“集聚”，流通本二作“聚集”。

受，子母俱損。又閻浮提臨命終人，不問善惡，我欲令是命終之人，不落惡道。何況自修善根，增我力故^[44]。是閻浮提行善之人，臨命終時，亦有百千惡道鬼神，或變作父母，乃至諸眷屬，引接亡人，令落惡道，何況本造惡者。世尊，如是閻浮提男子女人臨命終時，神識惛^[45]昧，不辨善惡，乃至眼耳更無見聞。是諸眷屬，當須設大供養，轉讀尊經，念佛菩薩名號。如是善緣，能令亡者離諸惡道，諸魔鬼神悉皆退散。世尊，一切眾生臨命終時，若得聞一佛名，一菩薩名，或大乘經典一句一偈，

[44] 故：《乾隆藏》《永乐北藏》《中華藏》《大正藏》均作“故”。流通本一作“故”，流通本二作“者”。

[45] 惛：神志不清。《乾隆藏》《永乐北藏》《中華藏》《大正藏》均作“惛”。流通本一作“昏”，流通本二作“昏”。

我观如是辈人，除五无间杀害之罪。小小恶业，合堕恶趣者，寻即解脱。

佛告主命鬼王，汝大慈故，能发如是大愿，于生死中，护诸众生。若未来世中，有男子女人，至生死时，汝莫退是愿，总令解脱，永得安乐。鬼王白佛言，愿不有虑，我毕是形，念念拥护阎浮众生，生时死时，俱得安乐。但愿诸众生于生死时，信受我语，无不解脱，获大利益。

尔时佛告地藏菩萨，是大鬼王主命者，已曾经百千生作大鬼王，于生死中，拥护众生。是大士慈悲愿故，现大鬼身，实非鬼也。却后过一百七十劫，当得成佛，号曰无相如来，劫名安乐，世界名净住，其佛寿命不可计劫。地

藏，是大鬼王，其事如是不可思议，所度天人^[46]亦不可限量。

称佛名号品第九

尔时地藏菩萨摩诃萨白佛言，世尊，我今为未来众生演利益事，于生死中，得大利益，唯愿世尊，听我说之。佛告地藏菩萨，汝今欲兴慈悲，救拔一切罪苦六道众生，演不思议事，今正是时，唯当速说。吾即涅槃，使汝早毕是愿，吾亦无忧现在未来一切众生^[47]。

地藏菩萨白佛言，世尊，过去无量阿僧祇劫，有佛出世，号无边身如

[46] 天人：《乾隆藏》《永乐北藏》《中华藏》《大正藏》均作“天人”。流通本一作“天人”，流通本二作“人天”。

[47] 生：《乾隆藏》作“王”，应为误刻。《永乐北藏》《中华藏》《大正藏》均作“生”。流通本一作“生”，流通本二作“生”。

来。若有男子女人闻是佛名，暂生恭敬，即得超越四十劫生死重罪。何况塑画形像，供养赞叹，其人获福无量无边。又于过去恒河沙劫，有佛出世，号宝性如来。若有男子女人闻是佛名，一弹指顷，发心归依，是人于无上道，永不退转。又于过去有佛出世，号波头摩胜如来。若有男子女人闻是佛名，历于耳根，是人当得千返生于六欲天中，何况志心称念。又于过去不可说不可说阿僧祇劫，有佛出世，号狮子吼如来。若有男子女人闻是佛名，一念归依，是人得遇无量诸佛，摩顶授记。又于过去有佛出世，号拘留孙佛。若有男子女人闻是佛名，志心瞻礼，或复赞叹，是人于贤劫千佛会中，为大梵王，得授上记。

又于过去有佛出世，号毗婆尸^[48]。若有男子女人闻是佛名，永不堕恶道，常生人天，受胜妙乐。又于过去无量无数恒河沙劫，有佛出世，号宝胜如来。若有男子女人闻是佛名，毕竟不堕恶道，常在天上，受胜妙乐。又于过去有佛出世，号宝相如来。若有男子女人闻是佛名，生恭敬心，是人不久得阿罗汉果。又于过去无量阿僧祇劫，有佛出世，号袈裟幢如来。若有男子女人闻是佛名者，超一百大劫生死之罪。又于过去有佛出世，号大通山王如来。若有男子女人闻是佛名者，是人得遇恒河沙佛广为说法，必成菩提。又于过去，有净月

[48] 号毗婆尸：《乾隆藏》《永乐北藏》《中华藏》《大正藏》均作“号毗婆尸”。流通本一作“号毗婆尸”，流通本二作“号毗婆尸佛”。

佛，山王佛，智勝佛，淨名王佛，智成就佛，無上佛，妙聲佛，滿月佛，月面佛，有如是等不可說佛。世尊，現在未來一切眾生，若天若人，若男若女，但念得一佛名號，功德無量，何況多名。是眾生等，生時死時，自得大利，終不墮惡道。若有臨命終人，家中眷屬，乃至一人，為是病人，高声念一佛名，是命終人，除五無間罪，余業報等悉得消滅。是五無間罪，雖至極重，動經億劫，了不得出，承斯臨命終時，他人為其稱念佛名，於是罪中，亦漸消滅。何況眾生自稱自念，獲福無量，滅無量罪。



赞

普贤启问 地藏宏开 三途六道绝
尘埃 普广问如来 授记十斋 接引上
莲台

南无地藏王菩萨摩訶萨（三称）

地藏菩萨本愿经卷下

唐于阗国三藏沙门实叉难陀译

校量布施功德缘品第十

尔时地藏菩萨摩訶萨承佛威神，从座而起，胡跪合掌，白佛言，世尊，我观业道众生，校量布施，有轻有重，有一生受福，有十生受福，有百生千生受大福利^[49]者，是事云何。唯愿世尊，为我说之。

尔时佛告地藏菩萨，吾今于忉利天宫一切众会，说阎浮提布施校量功

[49] 福利：《乾隆藏》《中华藏》《大正藏》均作“福利”，《永乐北藏》作“福”。流通本一作“福利”，流通本二作“福利”。

德轻重，汝当谛听，吾为汝说。地藏白佛言，我疑是事，愿乐欲闻。佛告地藏菩萨，南阎浮提有诸国王，宰辅大臣，大长者，大刹利，大婆罗门等，若遇最下贫穷，乃至癯残喑哑^[50]，聋痴无目，如是种种不完具者。是大国王等欲布施时，若能具大慈悲，下心含笑，亲手遍布施，或使人施，软言慰喻^[51]，是国王等所获福利，如布施百恒河沙佛功德之利。何以故。缘是国王等，于是最贫贱辈及不完具者，发大慈心，是故福利有如此报。百千生中，常得七宝具足，何况衣食受用。

[50] 喑哑：旧作“瘖症”。《乾隆藏》《中华藏》均作“瘖哑”，《永乐北藏》作“喑症”，《大正藏》作“瘖症”。流通本一作“喑哑”，流通本二作“喑症”。“瘖”字是“喑”的异体字。

[51] 喻：晓喻，开导。《乾隆藏》《永乐北藏》《中华藏》《大正藏》均作“喻”。流通本一作“谕”，流通本二作“谕”。

复次地藏，若未来世，有诸国王，至婆罗门等，遇佛塔寺，或佛形像，乃至菩萨，声闻，辟支佛像，躬自营办，供养布施。是国王等，当得三劫为帝释身，受胜妙乐。若能以此布施福利，回向法界，是大国王等，于十劫中，常为大梵天王。

复次地藏，若未来世，有诸国王，至婆罗门等，遇先佛塔庙，或至经像，毁坏破落，乃能发心修补。是国王等，或自营办，或劝他人，乃至百千人等布施结缘。是国王等，百千生中常为转轮王身。如是他人同布施者，百千生中常为小国王身。更能于塔庙前，发回向心，如是国王乃至诸人，尽成佛道，以此果报无量无边。

复次地藏，未来世中，有诸国王，及婆罗门等，见诸老病及生产妇女，若一念间，具大慈心，布施医药，饮食，卧具，使令安乐。如是福利最不思议，一百劫中常为净居天主，二百劫中常为六欲天主，毕竟成佛，永不堕恶道，乃至百千生中，耳不闻苦声。

复次地藏，若未来世中，有诸国王，及婆罗门等，能作如是布施，获福无量。更能回向，不问多少，毕竟成佛，何况释，梵，转轮之报。是故地藏，普劝众生当如是学。

复次地藏，未来世中，若善男子善女人，于佛法中，种少善根，毛发沙尘等许，所受福利，不可为喻。

复次地藏，未来世中，若有善男子

善女人，遇佛形像，菩薩形像，辟支佛形像，轉輪王形像，布施供養，得無量福，常在人天，受勝妙樂。若能回向法界，是人福利，不可為喻。

復次地藏，未來世中，若有善男子善女人，遇大乘經典，或聽聞一偈一句，發殷重心，讚嘆恭敬，布施供養，是人獲大果報，無量無邊。若能回向法界，其福不可為喻。

復次地藏，若未來世中，有善男子善女人，遇佛塔寺，大乘經典，新者布施供養，瞻禮讚嘆，恭敬合掌，若遇故者，或毀壞者，修補營理，或獨發心，或勸多人同共發心。如是等輩，三十生中常為諸小國王。檀越之人，常為輪王，還以善法教化諸小國王。

复次地藏，未来世中，若有善男子善女人，于佛法中所种善根，或布施供养，或修补塔寺，或装理经典，乃至一毛一尘，一沙一涕。如是善事，但能回向法界，是人功德，百千生中受上妙乐。如但回向自家眷属，或自身利益，如是之果，即三生受乐。舍一得万报。是故地藏，布施因缘，其事如是。

地神护法品第十一

尔时坚牢地神白佛言，世尊，我从昔来，瞻视顶礼无量菩萨摩訶萨，皆是大不可思议神通智慧，广度众生。是地藏菩萨摩訶萨，于诸菩萨誓愿深重。世尊，是地藏菩萨于阎浮提有大因缘。如文殊，普贤，观音，弥勒，亦化百千

身形，度于六道，其愿尚有毕竟。是地藏菩萨，教化六道一切众生，所发誓愿劫数，如千百亿恒河沙。世尊，我观未来及现在众生，于所住处，于南方清洁之地，以土石竹木作其龕室，是中能塑画，乃至金银铜铁，作地藏形像，烧香供养，瞻礼赞叹，是人居处，即得十种利益。何等为十。一者，土地丰壤。二者，家宅永安。三者，先亡生天。四者，现存益寿。五者，所求遂意。六者，无水火灾。七者，虚耗辟除。八者，杜绝恶梦。九者，出入神护。十者，多遇圣因。世尊，未来世中，及现在众生，若能于所住处方面，作如是供养，得如是利益。

复白佛言，世尊，未来世中，若

有善男子善女人，于所住处，有此经典及菩萨像，是人更能转读经典，供养菩萨。我常日夜以本神力，卫护是人，乃至水火盗贼，大横小横，一切恶事，悉皆消灭。

佛告坚牢地神，汝大神力，诸神少及。何以故。阎浮土地，悉蒙汝护，乃至草木沙石，稻麻竹苇，谷米宝贝，从地而有，皆因汝力。又当^[52]称扬地藏菩萨利益之事，汝之功德，及以神通，百千倍于常分地神。若未来世中，有善男子善女人，供养菩萨，及转读是经，但依地藏本愿经一事修行者，汝以本神力而拥护之，勿令一切灾害及不如意

[52] 当：顺时，顺理。《乾隆藏》《永乐北藏》《大正藏》《中华藏》作“当”。流通本一作“当”，流通本二作“常”。

事，辄闻于耳，何况令受。非但汝独护是人故，亦有释梵眷属，诸天眷属，拥护是人。何故得如是圣贤拥护。皆由瞻礼地藏形像，及转读是本愿经故，自然毕竟出离苦海，证涅槃乐。以是之故，得大拥护。

见闻利益品第十二

尔时世尊从顶门上放百千万亿大毫相光，所谓白毫相光，大白毫相光，瑞毫相光，大瑞毫相光，玉毫相光，大玉毫相光，紫毫相光，大紫毫相光，青毫相光，大青毫相光，碧毫相光，大碧毫相光，红毫相光，大红毫相光，绿毫相光，大绿毫相光，金毫相光，大金毫相光，庆云毫相光，大庆云毫相光，千



轮毫光，大千轮毫光，宝轮毫光，大宝轮毫光，日轮毫光，大日轮毫光，月轮毫光，大月轮毫光，宫殿毫光，大宫殿毫光，海云毫光，大海云毫光。于顶门上放如是等毫相光已，出微妙音，告诸大众，天龙八部，人非人等，听吾今日于忉利天宫，称扬赞叹地藏菩萨于人天中利益等事，不思議事，超圣因事，证十地事，毕竟不退阿耨多罗三藐三菩提事。

说是语时，会中有一菩萨摩訶萨，名观世音，从座而起，胡跪合掌白佛言，世尊，是地藏菩萨摩訶萨具大慈悲，怜愍罪苦众生，于千万亿世界，化千万亿身，所有功德及不思議威神之力，我闻世尊与十方无量诸佛，异口同

音赞叹地藏菩萨云，正使过去现在未来诸佛说其功德，犹不能尽。向者又蒙世尊普告大众，欲称扬地藏利益等事。唯愿世尊，为现在未来一切众生，称扬地藏不思议事，令天龙八部，瞻礼获福。

佛告观世音菩萨，汝于娑婆世界有大因缘。若天若龙，若男若女，若神若鬼，乃至六道罪苦众生，闻汝名者，见汝形者，恋慕汝者，赞叹汝者，是诸众生于无上道，必不退转，常生人天，具受妙乐。因果将熟，遇佛授记。汝今具大慈悲，怜愍众生，及天龙八部，听吾宣说地藏菩萨不思议利益之事。汝当谛听，吾今说之。观世音言，唯然，世尊，愿乐欲闻。

佛告观世音菩萨，未来现在诸世

界中，有天人受天福尽，有五衰相现，或有堕于恶道之者。如是天人，若男若女，当现相时，或见地藏菩萨形像，或闻地藏菩萨名，一瞻一礼，是诸天人，转增天福，受大快乐，永不堕三恶道报。何况见闻菩萨，以诸香，华，衣服，饮食，宝贝，瓔珞，布施供养，所获功德福利，无量无边。

复次观世音，若未来现在诸世界中，六道众生，临命终时，得闻地藏菩萨名，一声历耳根者，是诸众生，永不历三恶道苦。何况临命终时，父母眷属，将是命终人舍^[53]宅财物，宝贝^[54]衣

[53] 舍：《乾隆藏》作“金”，应为误刻，《永乐北藏》《中华藏》《大正藏》均作“舍”。流通本一作“舍”，流通本二作“舍”。

[54] 贝：《乾隆藏》《大正藏》均作“贝”，《永乐北藏》《中华藏》均作“具”。流通本一作“贝”，流通本二作“贝”。

服，塑画地藏形像。或使病人未终之时，眼耳见闻，知道眷属，将舍宅宝贝等，为其自身塑画地藏菩萨形像。是人若是业报合受重病者，承斯功德，寻即除愈，寿命增益。是人若是业报命尽，应有一切罪障业障，合堕恶趣者，承斯功德，命终之后，即生人天，受胜妙乐，一切罪障，悉皆消灭。

复次观世音菩萨，若未来世，有男子女人，或乳哺时，或三岁五岁十岁已^[55]下，亡失父母乃及亡失兄弟姊妹，是人年既长大，思忆父母及诸眷属，不知落在何趣，生何世界，生何天中。是人若能塑画地藏菩萨形像，乃至闻名，

[55] 已：通“以”。《乾隆藏》《永乐北藏》《中华藏》《大正藏》均作“已”。流通本一作“以”，流通本二作“以”。

一瞻一礼，一日至七日，莫退初心，闻名见形，瞻礼供养。是人眷属，假因业故，堕恶趣者，计当劫数，承斯男女兄弟姊妹塑画地藏形像，瞻礼功德，寻即解脱。生人天中^[56]，受胜妙乐者，即承斯功德，转增圣因，受无量乐。是人更能三七日中，一心瞻礼地藏形像，念其名字，满于万遍，当得菩萨现无边身，具告是人，眷属生界。或于梦中，菩萨现大神力，亲领是人，于诸世界，见诸眷属。更能每日念菩萨名千遍，至于千日，是人当得菩萨遣所在土地鬼神，终身卫护，现世衣食丰溢，无诸疾苦，乃至横事不入其门，何况及身。是人毕竟

[56] 中：在“中”字后面，《乾隆藏》《永乐北藏》《中华藏》《大正藏》均无“受胜妙乐，是人眷属，如有福力，已生人天”这句，今依藏经删除之。流通本一中有此句，流通本二中有此句。

得菩薩摩頂授記。

復次觀世音菩薩，若未來世，有善男子善女人，欲發廣大慈心救度一切眾生者，欲修無上菩提者，欲出離三界者。是諸人等，見地藏形像，及聞名者，至心歸依，或以香華衣服，寶貝飲食，供養瞻禮。是善男女等，所願速成，永無障礙。

復次觀世音，若未來世，有善男子善女人，欲求現在未來百千萬億等願，百千萬億等事，但當歸依瞻禮，供養讚嘆地藏菩薩形像，如是所願所求，悉皆成就。復願地藏菩薩具大慈悲，永擁護我，是人于睡夢中，即得菩薩摩頂授記。

復次觀世音菩薩，若未來世，善



男子善女人，于大乘经典，深生珍重，发不思議心，欲读欲诵。纵遇明师，教视令熟，旋得旋忘，动经年月，不能读诵。是善男子等，有宿业障，未得消除，故于大乘经典无读诵性。如是之人，闻地藏菩萨名，见地藏菩萨像，具以本心恭敬陈白，更以香，华，衣服，饮食，一切玩具，供养菩萨。以净水一盞，经一日一夜，安菩萨前，然后合掌请服，回首向南。临入口时，至心郑重。服水既毕，慎五辛，酒，肉，邪淫，妄语，及诸杀害，一七日或三七日。是善男子善女人，于睡梦中，具见地藏菩萨现无边身，于是人处，授灌顶水。其人梦觉，即获聪明，应是经典，一历耳根，即当永记，更不忘失一句一偈。

复次观世音菩萨，若未来世有诸人等，衣食不足，求者乖愿，或多病疾，或多凶衰，家宅不安，眷属分散，或诸横事，多来忤身，睡梦之间，多有惊怖。如是人等，闻地藏名，见地藏形，至心恭敬，念满万遍，是诸不如意事，渐渐消灭，即得安乐，衣食丰溢，乃至于睡梦中，悉皆安乐。

复次观世音菩萨，若未来世有善男子善女人，或因治生，或因公私，或因生死，或因急事，入山林中，过渡河海，乃及大水，或经险道。是人先当念地藏菩萨名万遍，所过土地，鬼神卫护，行住坐卧，永保安乐。乃至逢于虎狼师子，一切毒害，不能损之。

佛告观世音菩萨，是地藏菩萨，于

阎浮提有大因缘。若说于诸众生见闻利益等事，百千劫中，说不能尽。是故观世音，汝以神力流布是经，令娑婆世界众生，百千万劫永受安乐。尔时世尊而说偈言，

吾观地藏威神力，恒河沙劫说难尽，
见闻瞻礼一念间，利益人天无量事。
若男若女若龙神，报尽应当堕恶道，
至心归依大士身，寿命转增除罪障。
少失父母恩爱者，未知魂神在何趣，
兄弟姊妹及诸亲，生长以^[57]来皆不识，
或塑或画大士身，悲恋瞻礼不暂舍，
三七日中念其名，菩萨当现无边体，
示其眷属所生界，纵堕恶趣寻出离，

[57] 以：《乾隆藏》《中华藏》《大正藏》均作“以”，《永乐北藏》作“如”，应为误刻。流通本一作“以”，流通本二作“以”。

若能不退是初心，即获摩顶受圣记。
欲修无上菩提者，乃至出离三界苦，
是人既发大悲心，先当瞻礼大士像，
一切诸愿速成就，永无业障能遮止。
有人发心念经典，欲度群迷超彼岸，
虽立是愿不思议，旋读旋忘多废失，
斯人有业障惑故，于大乘经不能记，
供养地藏以香华，衣服饮食诸玩具，
以净水安大士前，一日一夜求服之，
发殷重心慎五辛，酒肉邪淫及妄语，
三七日内勿杀害，至心思念大士名，
即于梦中见无边，觉来便得利根耳，
应是经教历耳闻，千万生中永不忘，
以是大士不思议，能使斯人获此慧。
贫穷众生及疾病，家宅凶衰眷属离，
睡梦之中悉不安，求者乖违无称遂，

至心瞻礼地藏像，一切恶事皆消灭，
至于梦中尽得安，衣食丰饶神鬼护。
欲入山林及渡海，毒恶禽兽及恶人，
恶神恶鬼并恶风，一切诸难诸苦恼，
但当瞻礼及供养，地藏菩萨大士像，
如是山林大海中，应是诸恶皆消灭。
观音至心听吾说，地藏无尽不思议，
百千万劫说不周，广宣大士如是力。
地藏名字人若闻，乃至见像瞻礼者，
香华衣服饮食奉，供养百千受妙乐，
若能以此回法界，毕竟成佛超生死。
是故观音汝当知，普告恒沙诸国土。

嘱累人天品第十三

尔时世尊举金色臂，又摩地藏菩萨摩訶萨顶，而作是言，地藏，地藏，

汝之神力不可思議，汝之慈悲不可思議，汝之智慧不可思議，汝之辯才不可思議，正使十方諸佛讚嘆宣說汝之不思議事，千萬劫中不能得盡。地藏，地藏，記吾今日在忉利天中，于百千萬億不可說不可說一切諸佛菩薩，天龍八部大會之中，再以人天諸眾生等，未出三界，在火宅中者，付囑于汝，無令是諸眾生，墮惡趣中一日一夜，何況更落五無間及阿鼻地獄，動經千萬億劫，無有出期。地藏，是南閻浮提眾生，志性無定，習惡者多。縱發善心，須臾即退，若遇惡緣，念念增長。以是之故，吾分是形，百千萬億化度，隨其根性而度脫之。地藏，吾今殷勤以天人眾，付囑于汝。未來之世，若有天人，及善男子善

女人，于佛法中，种少善根，一毛一尘，一沙一涕，汝以道力，拥护是人，渐修无上，勿令退失。

复次地藏，未来世中，若天若人，随业报应，落在恶趣。临堕趣中，或至门首，是诸众生，若能念得一佛名，一菩萨名，一句一偈大乘经典，是诸众生，汝以神力，方便救拔，于是人所，现无边身，为碎地狱，遣令生天，受胜妙乐。尔时世尊，而说偈言，

现在未来天人众，吾今殷勤付嘱汝，
以大神通方便度，勿令堕在诸恶趣。

尔时地藏菩萨摩诃萨胡跪合掌白佛言，世尊，唯愿世尊，不以为虑。未来世中，若有善男子善女人，于佛法中，一念恭敬，我亦百千方便，度脱是人，

于生死中，速得解脫。何況聞諸善事，念念修行，自然于无上道永不退轉。

說是語時，會中有一菩薩，名虛空藏，白佛言，世尊，我自至忉利，聞于如來讚歎地藏菩薩威神勢力，不可思議。未來世中，若有善男子善女人，乃及一切天龍，聞此經典，及地藏名字，或瞻禮形像，得幾種福利。唯愿世尊，為未來現在一切眾等，略而說之。

佛告虛空藏菩薩，諦听，諦听，吾當為汝分別說之。若未來世，有善男子善女人，見地藏形像，及聞此經，乃至讀誦，香華飲食，衣服珍寶，布施供養，讚歎瞻禮，得二十八種利益。一者，天龍護念。二者，善果日增。三者，集聖上因。四者，菩提不退。五

者，衣食丰足。六者，疾疫不临。七者，离水火灾。八者，无盗贼厄。九者，人见钦敬。十者，神鬼助持。十一者，女转男身。十二者，为王臣女。十三者，端正相好。十四者，多生天上。十五者，或为帝王。十六者，宿智命通。十七者，有求皆从。十八者，眷属欢乐。十九者，诸横消灭。二十者，业道永除。二十一者，去处尽通。二十二者，夜梦安乐。二十三者，先亡离苦。二十四者，宿福受生。二十五者，诸圣赞叹。二十六者，聪明利根。二十七者，饶慈愍心。二十八者，毕竟成佛。

复次虚空藏菩萨，若现在未来天龙鬼神，闻地藏名，礼地藏形，或闻地

藏本愿事行，赞叹瞻礼，得七种利益。一者，速超圣地。二者，恶业消灭。三者，诸佛护临。四者，菩提不退。五者，增长本力。六者，宿命皆通。七者，毕竟成佛。

尔时十方一切诸来，不可说不可说诸佛如来，及大菩萨天龙八部，闻释迦牟尼佛称扬赞叹地藏菩萨大威神力，不可思议，叹未曾有。是时忉利天，雨无量香，华，天衣，珠璣，供养释迦牟尼佛，及地藏菩萨已，一切众会，俱复瞻礼，合掌而退。

地藏菩萨本愿经卷下



贊

地藏本誓 校量經因 癡殘暗啞是
前生 今世諷大乘 福利無窮 決定寶
蓮生

南無地藏王菩薩摩訶薩（三稱）

地藏赞

地藏菩萨妙难伦，化现金容处处分。
三途六道闻妙法，四生十类蒙慈恩。
明珠照彻天堂路，金锡振开地狱门。
累劫亲姻蒙接引，九莲台畔礼慈尊。

南无九华山幽冥世界大慈大悲十轮
拔苦本尊地藏王菩萨

南无地藏王菩萨（数百千声）

地藏菩萨灭定业真言

唵 钵啰末邻陀宁 娑婆诃

回向偈

诵经功德殊胜行，无边胜福皆回向。
普愿沉溺诸众生，速往无量光佛刹。
十方三世一切佛，一切菩萨摩訶萨，
摩訶般若波罗蜜。

三皈依

自皈依佛，当愿众生，体解大道，
发无上心。

自皈依法，当愿众生，深入经藏，
智慧如海。

自皈依僧，当愿众生，统理大众，
一切无碍。和南圣众。



附录

赞礼地藏菩萨忏愿仪

明菩萨沙弥古吴智旭述

（行者净身口意，至尊像前，应念我及众生，积迷造罪，无救无归，大士洪慈，为归为救。又念大士法身，及十方三宝，体常遍满，无所不在，与我现前心性，平等无二，起深信解，如奉慈颜。敷具拱立，唱云。）

一切恭敬。

一心顶礼，十方常住三宝。（总一礼已。是诸众等，各各胡跪，严持香华，如法供养。唱云。）

愿此香华云，遍满十方界。供养一切佛，尊法诸贤圣。无边佛土中，受

用作佛事。（至此停唱。烧香散华，至心想云。一切佛法僧宝，体常遍满，无所不在。愿令以此香华，等同法性，普熏一切诸佛刹土，施作佛事。十方一切供具，无时不有。我今当以十方所有，一切种种香华瓔珞，幢幡宝盖，诸珍妙饰，种种音乐，灯明烛火，饮食衣服，卧具汤药，乃至尽十方所有，一切种种庄严供养之具，忆想遥拟，普共众生，奉献供养。一切世界中，有修供养者，我今随喜。若未修供养者，愿得开导，令修供养。又愿我身，速能遍至一切刹土，于一一佛法僧所，各以一切种^[58]庄严供养之具，共一切众生等持奉献，供

[58] 种：《卮续藏经》作“种”。流通本作“种种”。《乾隆藏》《永乐北藏》《中华藏》《大正藏》中所收录《占察善恶业报经》原文，均为“种”

养一切诸佛，法身色身舍利形像，浮图庙塔，一切佛事。供养一切所有法藏，及说法处。供养一切贤圣僧众。愿共一切众生，修行如是供养已，渐得成就六波罗蜜，四无量心。深知一切法，本来寂静，无生无灭，一味平等，离念清净，毕竟圆满。（想已起云。）

供养已，一切恭敬。（一礼已，次复合掌。赞云。）

南无地藏菩萨摩诃萨，以神通力，现声闻像。是诸微妙，功德伏藏。是诸解脱，珍宝出处。是诸菩萨，明净眼目。是趋涅槃，商人导首。如如意珠，雨众财宝，随所希求，皆令满足。照行善者，犹如朗日。照失道者，犹如明炬。除烦恼热，如月清凉。渡四流者，

为作桥梁。趋彼岸者，为作船筏。伏诸外道，如师子王。降诸天魔，如大龙象。护诸怖畏，如亲如友。防诸怨敌，如堑如城。救诸危难，犹如父母。藏诸怯劣，犹若丛林。令诸有情，善根不坏。现妙境界，令众欣悦。劝发有情，增上惭愧。求福慧者，令具庄严。能无功，转大法轮。殊胜功德，不能测量。久修坚固，大愿大悲。勇猛精进，过诸菩萨。于一食顷，至心归依，称名念诵，礼拜供养。能令一切，皆离忧苦。求诸所愿，速得满足。安置生天，涅槃之道。故我一心，归命顶礼。（赞已，一礼，添香，致敬。唱云。）

一心顶礼，本师释迦牟尼如来。

（拜下想云。能礼所礼性空寂，感应道交难



思议。我此道场如帝珠，释迦如来影现中。我身影现如来前，头面接足归命礼。下皆准^[59]此，唯改佛名。)

一心顶礼，过去师子奋迅具足万行如来，觉华定自在王如来。

一心顶礼，一切智成就如来，清净莲华目^[60]如来。

一心顶礼，无边身如来，宝性如来，波头摩胜如来，师子吼如来。

一心顶礼，宝胜如来，宝相如来，袈裟幢如来，大通山王如来。

一心顶礼，净月佛，山王佛，智胜佛，净明王佛，智成就佛，无上佛，妙声佛，满月佛，月面佛，如是等不可说

[59] 准：《圜续藏经》作“准”。流通本作“如”。

[60] 目：《圜续藏经》作“日”，应为误刻。流通本作“目”。



诸佛如来。

一心顶礼，拘留孙佛，毗婆尸佛等七佛如来。

一心顶礼，普光佛等五十三佛如来。

一心顶礼，过去殑伽沙等诸佛如来。

一心顶礼，忉利天宫十方集会无量世界，不可说不可说一切诸佛如来。

一心顶礼，未来净住世界安乐劫中无相如来，及十方三世一切诸佛如来。

一心顶礼，十方一切诸佛所有色身，舍利，形像，浮图庙塔，一切佛事。（想云。诸佛法身如虚空，化事住世难思议。我皆影现化事前，一一皆悉归命礼。）

一心顶礼，地藏菩萨本愿经，大乘大集地藏十轮经，占察善恶业报经，及

十方三世一切法藏。（总三礼。想云。真空法界如虚空，常住法宝难思议。我皆影现法宝前，莫不皆悉归命礼。）

一心顶礼，文殊师利菩萨，财首菩萨，定自在王菩萨摩诃萨。（想偈如佛，但改菩萨名字。下皆仿此。）

一心顶礼，无尽意菩萨，解脱菩萨，普贤菩萨摩诃萨。

一心顶礼，普广菩萨，观世音菩萨，虚空藏菩萨摩诃萨。

一心顶礼，好疑问菩萨，弥勒菩萨，金刚藏菩萨，坚净信菩萨摩诃萨。

一心顶礼，十方三世一切菩萨摩诃萨。

一心顶礼，憍陈那尊者，优波离尊者，目乾连尊者，一切声闻缘觉贤圣僧。



一心顶礼，忉利宫中，分身来集地藏菩萨摩訶萨。

一心顶礼，大集会中，现声闻相地藏菩萨摩訶萨。

一心顶礼，占察经中，善安慰说地藏菩萨摩訶萨。

一心顶礼，入能发智定地藏菩萨摩訶萨。

一心顶礼，入具足无边智定地藏菩萨摩訶萨。

一心顶礼，入具足清净智定地藏菩萨摩訶萨。

一心顶礼，入具足惭愧智定地藏菩萨摩訶萨。

一心顶礼，入具足诸乘明定地藏菩萨摩訶萨。



一心顶礼，入无忧神通明定地藏菩萨摩訶萨。

一心顶礼，入具足胜通明定地藏菩萨摩訶萨。

一心顶礼，入普照诸世间定地藏菩萨摩訶萨。

一心顶礼，入诸佛灯炬明定地藏菩萨摩訶萨。

一心顶礼，入金刚光定地藏菩萨摩訶萨。

一心顶礼，入智力难摧^[61]伏定地藏菩萨摩訶萨。

一心顶礼，入电光明定地藏菩萨摩訶萨。

[61] 摧：《卮续藏经》作“推”。流通本作“推”。《乾隆藏》《永乐北藏》《中华藏》《大正藏》中所收录《大乘大集地藏十轮经》原文，均为“摧”。



一心顶礼，入具足上妙味定地藏菩萨摩訶萨。

一心顶礼，入具足胜精气定地藏菩萨摩訶萨。

一心顶礼，入上妙诸资具定地藏菩萨摩訶萨。

一心顶礼，入无诤智定地藏菩萨摩訶萨。

一心顶礼，入能引胜踊跃定地藏菩萨摩訶萨。

一心顶礼，入具足世路光定地藏菩萨摩訶萨。

一心顶礼，入善住胜金刚定地藏菩萨摩訶萨。

一心顶礼，入增上观胜幢定地藏菩萨摩訶萨。



一心顶礼，入具足慈悲声定地藏菩萨摩訶萨。

一心顶礼，入引集诸福德定地藏菩萨摩訶萨。

一心顶礼，入海电光定地藏菩萨摩訶萨。

一心顶礼，能入如是殒伽沙等诸定，成熟一切有情地藏菩萨摩訶萨。

一心顶礼，以诸定力除刀兵劫，地藏菩萨摩訶萨。

一心顶礼，以诸定力除疫^[62]病劫，地藏菩萨摩訶萨。

一心顶礼，以诸定力除饥馑劫，地藏菩萨摩訶萨。

[62] 疫：《卮续藏经》作“疾”。流通本作“疫”。《乾隆藏》《永乐北藏》《中华藏》《大正藏》中所收录《大乘大集地藏十轮经》原文，均为“疫”。

（礼竟，如前想偈毕，复作是念。我及众生，无始常为，三业六根，重罪所障，不见诸佛，不知出要，但顺生死，不知妙理。我今虽知，犹与众生，同为一，重罪所障。今对地藏十方佛前，普为众生，归命忏悔，惟愿加护，令障消灭。作是念已，胡跪。唱言。）

普为法界一切众生，悉愿断除三障，归命忏悔。

（唱已，五体投地，复作是念。我与众生，无始来今，繇^[63]爱见故，内计我人①，外加恶友②，不随喜他，一毫之善③，惟遍三业，广造众罪④。事虽不广，恶心遍布⑤。昼夜相续，无有间断⑥。覆讳过失，不欲人知⑦。不畏恶道

[63] 繇：通“由”。《圜续藏经》作“繇”。流通本作“繇”。

⑧，无惭无愧⑨，拨无因果⑩。故于今日，深信因果①，生重惭愧②，生大怖畏③，发露忏悔④。断相续心⑤，发菩提心，断恶修善⑥。勤策三业，翻昔重过⑦。随喜凡圣，一毫之善⑧。念十方佛，有大福慧，能救拔我，及诸众生，从二死海，置三德岸⑨。从无始来，不知诸法，本性空寂，广造众恶。今知空寂，为求菩提，为众生故，广修诸善，遍断众恶⑩。惟愿地藏，慈悲摄受。作是念已，应起胡跪。唱言。）

至心忏悔，我弟子（某甲），与法界众生，自迷法性，枉受轮回，无明覆心，不知出要。怀聪明慢，自实愚痴。闻大乘法，谬生空解。拨无因果，断



灭善根。远离正信，远离正愿。离正意乐，及以正见。远善知识，好处好时。远离净戒，正定正慧。随逐恶友，起诸邪见。造身语意，无量罪业。或复毁谤，大乘正法。或复毁谤，独觉乘法。或复毁谤，声闻乘法。障蔽隐没，不令流布。或复于彼，诸佛弟子，若是法器，若非法器，具戒破戒，下至无戒，著片袈裟，剃须发者，多行忿恨，诃骂毁辱，讥刺诽谤。隐善扬恶，以粗恶言。期克迫胁^[64]，打棒伤害。侵夺衣钵^[65]，侵夺资生，绝其饮食，退令还俗，脱其袈裟，枷锁系缚，禁闭牢狱。轻慢触恼，令不安乐。夺宰堵波，及僧祇

[64] 胁：《圜续藏经》作“脅”。流通本作“脅”。“脅”是繁体，“胁”为简体，“脅”是异体。

[65] 衣：《圜续藏经》作“依”，应为误刻。流通本作“衣”。

物。十恶五逆，至一阐提，乘此业缘，于无量劫，堕诸恶趣，备历三途，受种种苦，楚痛^[66]难言。设得值遇无量诸佛及大菩萨，亲承供养，发露忏除。复更护持，无量道法。修学无量，难行苦行。由彼业障，有余未尽，令我等辈，未能证得，安乐涅槃。未能证得，三摩地门，殊胜功德。

今向地藏菩萨摩诃萨，及诸佛世尊，发大乘心，弘如来教。为令此土，三宝种性，威德炽盛，久住世故。为欲摧灭，一切众生，坚固烦恼，令无余故。与诸众生，复深惭愧，发露忏悔，求悉消除。

惟愿十方诸大慈尊，及地藏大士，

[66] 楚痛：《乐续藏经》作“楚痛”。流通本作“痛楚”。



哀愍覆护，济拔我等。令此罪障，皆得除灭，永不复受，恶趣苦果。我等今者，对世尊前，及与大士，以至诚心，发真誓愿，从今以去，乃至菩提。常愿不遇，如是恶缘。决定不造，如是重罪。终不毁谤，诸佛正法。亦不触恼，诸出家人。必不挑坏，众生法眼，亦不断灭，三宝种性。

惟愿世尊，及与大士，摄受证知，所发誓愿。令我等早成十法，及成十轮。获得无罪，正路法忍。于三乘法，若三乘人，及非法器，得无失误。于大乘法，升进无转。利慧胜福，常得增长。于一切定，诸陀罗尼，诸忍诸地，速得自在。常得值遇，诸善知识，常得不离。见一切佛，及诸菩萨，声闻弟

子。不离闻法，不离亲近，供养众僧。于诸善根，常能精进。菩提行愿，无厌足心。先所造恶，摧坏散灭。速能证得，无上法轮。善巧方便，成熟众生，皆令获得，利益安乐。（或一说或三说。起立唱云。）

忏悔发愿已。归命礼三宝。

（一礼已，起立。正身运想，一切三宝，遍满虚空，安坐法座。一一回身，如法旋绕。此身如影，音声如响，普遍十方，上供三宝，下警群灵，勿令心散。和雅唱云。）

南无十方佛。

南无十方法。

南无十方僧。

南无本师释迦牟尼佛。



南无地藏菩萨本愿经。

南无大乘大集地藏十轮经。

南无占察善恶业报经。

南无地藏菩萨摩诃萨。（或三称，或七称。旋绕既毕，回身至法座前，正立。至心唱云^[67]。）

自归依佛，当愿众生，体解大道，发无上心。

自归依法，当愿众生，深入经藏，智慧如海。

[67] 至心唱云：《圻续藏经》作“至心唱云”。流通本作“举赞”。流通本在“举赞”和“三归”之间加入了如下的“赞偈、三称、回向”：

地藏大士，誓愿宏深。明珠照破铁围城，金锡振幽冥。花雨缤纷，大地布阳春。

南无地藏王菩萨摩诃萨（三称）

（回向偈）

礼忏功德殊胜行，无边胜福皆回向，
普愿沉溺诸有情，速往无量光佛刹。
十方三世一切佛，一切菩萨摩诃萨，
摩诃般若波罗蜜。



自归依僧，当愿众生，统理大众，
一切无碍。和南圣众。

（问讯毕^[68]。次至静室，或念地藏菩萨名，或持灭定业真言，或观大士平等法身，或作唯心识等二种观道。唯信唯笃，则必能灭障，必证法忍矣。）

[68] 问讯毕：流通本在“问讯毕”前有一句“再礼佛三拜”。《卮续藏经》则无此句。

后序

呜呼，大法久湮，人多谬解，执大谤小，举世皆然。宁知地狱众苦，已随其后。喑哑^[69]余报，复更难穷。故我地藏慈尊，于大集会中，现声闻相。而世尊广叹胜德，且为之较量云。假使有人，于弥勒妙吉祥，并观自在普贤之类，殒伽沙等大菩萨所，于百劫中，至心归依称念礼供，求诸所愿。不如有人，于一食顷，归依称念礼供地藏。以菩萨久修坚固，大愿大悲，勇猛精进，过诸菩萨故也。盖末世之中，驾言于大

[69] 喑哑：旧作“瘖瘖”。《圜续藏经》作“瘖瘖”。流通本作“瘖瘖”。“瘖”字是“喑”的异体字。

乘甚易，而躬行于僧行实难。宁知废小谈大，并其大而亦非。悟大用小，并其小而亦大。故法华诫弘经者，必依四安乐行。涅槃极谈常住佛性，尤扶戒律。今大士之功德独盛，得非亦在此乎。

智旭深恨夙生恶习，少年力诋三宝，造无间罪。赖善根未殒，得阅本愿尊经，知有出世大孝，乃转邪见而生正信。仍以谤法余业，虽辛勤修证，不登法忍。每一展读大士三经，辄不禁涕泗横流。悲昔日之无知，感大士之拯拔也。因念浊智流转之日，与我同此过者不少。敬宗十轮，并本愿占察二典，述此仪法。庶几共涤先愆，克求后果，不终为无依行乎。未登无生正位，皆可修之，无论初心与久学也。



第一句的重音放在“南无”上，一心归命。要唱出在生死旷野寻求佛力救度的渴望。

第二句的重音放在“阿弥”上，在苦苦寻求中，历经难险，终于找到了南无的对象，就是阿弥陀佛。要唱出寻找到阿弥陀佛的欢欣。

第三句的重音放在“陀”上，当我们归命于阿弥陀佛时，觉了原来阿弥陀佛与我竟是同体，我在弥陀心中念佛，弥陀在我心中呼应加持。要唱出弥陀与我同体同源的欣慰。

第四句的重音又放在“阿弥”上，当觉了阿弥陀佛与我同体时，回光反照，原来我自性即是阿弥陀佛“无量光寿”。要唱出自性弥陀的自信自肯。由归命到归元。

这样，第一句向外部的渴望寻找，到第四句向内心安稳的回归，形成东林佛号四句一组的音声结构，四句佛号不断循环。

唱念的音声抑扬结构掌握后，加之两个配合：

（一）佛号与步点的配合。一句佛号走四步，“南无”一步（迈右脚），“阿弥”一步（迈左脚），“陀”一步（迈右脚），“佛”一步（迈左脚）。随法器音声节奏，走准四个步点。

（二）佛号与呼吸的配合。中间停顿时，深吸气到腹



部，脐轮发音，一口气将佛号念完，浑融一体。

如是持念，久久便能唱出东林佛号的韵味，悲欣交集，香光庄严。伏冀念佛同仁共勉。

回向偈

愿以此功德 庄严佛净土
上报四重恩 下济三涂苦
若有见闻者 悉发菩提心
尽此一报身 同生极乐国

印造佛经佛像之十大利益

- 一、从前所作种种罪过，轻者立即消灭，重者亦得转轻。
- 二、常得吉神拥护，一切瘟疫、水火、寇盗、刀兵、牢狱之灾，悉皆不受。
- 三、夙世怨对，咸蒙法益，而得解脱，永免寻仇报复之苦。
- 四、夜叉恶鬼，不能侵犯，毒蛇饿虎，不能为害。
- 五、心得安慰，日无险事，夜无恶梦，颜色光泽，气力充盛，所作吉利。
- 六、至心奉法，虽无希求，自然衣食丰足，家庭和睦，福寿绵长。
- 七、所言所行，人天欢喜。任到何方，常为多众倾诚爱戴，恭敬礼拜。
- 八、愚者转智，病者转健，困者转亨。为妇女者，报谢之日，捷转男身。
- 九、永离恶道，受生善道。相貌端正，天资超越，福禄殊胜。
- 十、能为一切众生，种植善根。以众生心，作大福田，获无量胜果。所生之处，常得见佛闻法，直到三慧宏开，六通亲证，速得成佛。